

《瑜伽師地論》卷二十六

佛為長老頡隸伐多開示節錄

如佛世尊曾為長老頡隸伐多說如是義；曾聞長老頡隸伐多問世尊言：大德！諸有苾芻勤修觀行，是瑜伽師，能於所緣安住其心。為何於緣安住其心？云何於緣安住其心？齊何名為心善安住？

佛告長老頡隸伐多：善哉！善哉！汝今善能問如是義。汝今諦聽，極善思惟，吾當為汝宣說開示。

頡隸伐多！諸有苾芻勤修觀行，是瑜伽師，能於所緣安住其心。或樂淨行、或樂善巧、或樂令心解脫諸漏，於相稱緣安住其心，於相似緣安住其心，於緣無倒安住其心，能於其中不捨靜慮。

云何苾芻勤修觀行，是瑜伽師，於相稱緣安住其心？謂彼苾芻若唯有貪行，應於不淨緣安住於心，如是名為於相稱緣安住其心。

若唯有瞋行，應於慈愍安住其心；

若唯有癡行，應於緣性緣起安住其心；

若唯有慢行，應於界差別安住其心；

若唯有尋思行，應於阿那波那念安住其心。

如是名為於相稱緣安住其心。

頡隸伐多！又彼苾芻若愚諸行自相，愚我、有情、命者、生者、能養育者、補特伽羅事，應於蘊善巧安住其心。

若愚其因，應於界善巧安住其心。

若愚其緣，應於處善巧安住其心；

若愚無常、苦、空、無我，應於緣起、處非處善巧安住其心。

若樂離欲界欲，應於諸欲麤性、諸色靜性安住其心；

若樂離色界欲，應於諸色麤性、無色靜性安住其心。

若樂通達及樂解脫遍一切處薩迦耶事，應於苦諦、集諦、滅諦、道諦安住其心。

是名苾芻勤修觀行，是瑜伽師，於相稱緣安住其心。

頡隸伐多！云何苾芻勤修觀行，是瑜伽師，於相似緣安住其心？

謂彼苾芻，於彼彼所知事，為欲揀擇、極揀擇、遍尋思、遍伺察故，於先所見、所聞、所覺、所知事，由見聞覺知增上力故，以三摩呬多地作意，思惟分別而起勝解。

彼雖於其本所知事不能和合現前觀察，然與本事相似而生，於彼所緣有彼相似唯智、唯見、唯正憶念。

又彼苾芻，於時時間令心寂靜，於時時間依增上慧法毗鉢舍那，勤修觀行。

是名苾芻勤修觀行，是瑜伽師，於相似緣安住其心。

頡隸伐多！云何苾芻勤修觀行，是瑜伽師，於緣無倒安住其心？

謂若苾芻勤修觀行，是瑜伽師，於所緣境安住其心，隨應解了所知境界，如實無倒能遍了知。

是名苾芻勤修觀行，是瑜伽師，於緣無倒安住其心。

頡隸伐多！云何苾芻勤修觀行，是瑜伽師，能於其中不捨靜慮？

謂若苾芻勤修觀行，是瑜伽師，如是於緣正修行時，無間加行、殷重加行，於時時間修習止相、舉相、捨相。

由修、由習、由多修習為因緣故，

一切麤重悉皆息滅，隨得觸證所依清淨。

於所知事，由現見故，隨得觸證所緣清淨。

由離貪故，隨得觸證心遍清淨。

離無明故，隨得觸證智遍清淨。

是名苾芻勤修觀行，是瑜伽師，能於其中不捨靜慮。

頡隸伐多！為此苾芻於所緣境安住其心，

如是於緣安住其心，如是於緣安住心已，名善安住。

世尊此中重說頌曰：

行者行諸相 知一切實義 常於影靜慮 得證遍清淨

此中說言：行者行諸相者。

由此宣說修觀行者，於止、舉、捨相，無間修行、殷重修行。

若復說言：知一切實義者。由此宣說事邊際性。

若復說言：常於影靜慮者。由此宣說有分別影像、無分別影像。

若復說言：得證遍清淨者。由此宣說所作成辦。

此中世尊復說頌曰：

於心相遍知 能受遠離味 靜慮常委念 受喜樂離染

此中說言：於心相遍知者。謂有分別影像、無分別影像，

以心相名說；事邊際性，以遍知名說。

若復說言：能受遠離味者。由此宣說於其所緣正修行者，樂斷樂修。

若復說言：靜慮常委念者。由此宣說於奢摩他、毗鉢舍那，常勤修習、委練修習。

若復說言：受喜樂離染者。由此宣說所作成辦。